

四庫全書

集部

欽定四庫全書

集部

文恭集卷

三十六至
四十

詳校官侍講

臣王燕緒

檢討

臣

何思鈞覆勘

總校官原任中允

臣王燕緒

校對官編修

臣于鼎

謄錄監生

臣章玉植

欽定四庫全書

文恭集卷三十六

宋 胡宿 撰

誌銘

宋故左龍武衛大將軍李公墓誌銘

昔在漢火之微焱欲起蜀其後唐土之圯餘烈在南公

諱從浦字可大本名初謙

案初謙五代史作從謙與此不同初字疑誤

憲宗

第八子建王恪之後南唐烈祖之孫元宗之子後主之

貴介弟江左之佳公子也後主友愛異于他弟開寶中
受言奉幣入貢誕節太祖皇帝嘉其占對厚膺蕃錫迎
勞甚渥休舍未遣後主嘗因置酒惻然有勤望之勞賦
青青河畔草一篇章末有王孫歸不歸翠色和春老之
句當時士人莫不傳諷累封宜春吉水二郡王我真人
既興歸運有屬臺城隨下青蓋入侍太祖記使乎之舊
寵裸將之敏授右神武大將軍領漢東郡事未幾夏師
繼捧挈河右之圖舉國內屬朝廷授以崇信節制移公

江夏歲滿授代政號連最復拜尺一出典同谷淳化中
蜀盜竊發王師致討郡扼邛笮之要據汧隴之交羽檄
迅召王人旁午資糧屨屨之給文書調度之煩按以軍
興急于星火公畢力匪懈內憤小醜操心甚危外防一
切劇煩難給瞿繭弗支以疾自陳有詔聽還京師且便
醫藥家居滿告表求分務優不之許厚令自持久之進
秩武勝軍節度行軍司馬簽書州事固辭簽書從之特
賜錢二十萬非例也後病寢劇以至道元年六月癸卯

卒于南陽之館舍享年五十公體傑且秀神遠而清幼習自然長蹈彌勝辭有思致書善真行不眩紛華所履恬素少有學尚能談禪要遺去法縛獨與神會用能時進退而兩得履險夷而一致澄撓不見其際纖介莫窺其間自非誠而明之遽于道者孰能預于此享食二藩歷典三郡所至必入去輒見思厥初至同谷郡有重繫獄已告具公察囚色意其有寃呼之使前屏人獨問久乃自言農家子持耰前行暮夜亭長錄以為盜規贖未

獲之負為決曹掾吳廷皎楚掠因自誣服公徙繫別獄
剖驗乃實所全活者十餘輩人以為神明轉運使盧公
之翰鄭公文寶皆偉人也以狀條聞乞加擢序太宗嘉
歎璽書褒勞焉少貴率禮寬中尚恕折獄多陰德典城
有遺愛官止環衛年纔中壽知其留慶自他有裕也後
以刑部有著于朝累贈左衛上將軍夫人徐氏桂陽郡
公邈之女在江南日以鄖國封小君之號次彭城郡君
劉氏亦華腴之選竝先君而亡次號略郡君楊氏躬柔

間之尚後公而終男子七人長仲儀左班殿直仲昕右
班殿直仲勗無祿仲某三班借職竝相繼而殞仲偃登
進士第以清文雅行士林向慕歷踐省閣參著風業今
任尚書刑部郎中淮南轉運使仲連右侍禁仲荀郊社
齋郎三女長嫁瑯琊王祐之次二女內寺出家為尼竝
賜紫方袍善才號妙智大師善聰號崇因大師嫁王氏
與善聰皆早卒孫男孝友以下九人孝友剡縣尉孝嗣
試校書郎公含璧之際權寔于穰之佛寺至咸平己亥

仲儀官龍舒始遷寔于潯之某里介于靈仙道館山谷
之間宜體魄之用寧而慶靈之來復銘曰彼公子兮真
李枝初使我兮敏有辭奉裸將兮來京師秩環衛兮屏
于隨政寬惠兮衆以熙三去郡兮輒見思茲有數兮不
可知甫知命兮哲其萎德既充兮壽弗支來葉茂兮實
累累潯山秀兮下有溪精氣利澤舒所依三祖往兮靈
仙棲公真宅兮介于斯

宋故宣徽北院使奉國軍節度使明州管內觀察

處置等使金紫光祿大夫檢校太保使持節明州
諸軍事明州刺史兼御史大夫判并州河東路經
略安撫使兼并代澤潞麟府嵐石兵馬都部署上
柱國滎陽郡開國公食邑二千五百戶食實封三
百戶贈太尉文肅鄭公墓誌銘

皇祐五年冬十一月甲子有宋儒帥宣徽北院使奉國
軍節度使鄭公薨于并天子震嗟朝不御者二日以太
尉贈冊告其第大鴻臚賻以常典加等官上易名之典

請用文肅詔曰嘻可初公以疾聞上立遣左璫賜殿中湯藥勅太醫馳視聞其未有間也復遣高手乘急置以往至則無及已公初疾革猶力條備邊十數事謂敵驕難制邊費益困勸上詳思至策規強中國因言命在漏刻不復奉望帷幄不勝至願願歸塋先隴以是累陛下上嘉納遺忠益哀傷其意遣使給舸護喪還東勅所過治道詔本郡給塋事以明年八月二十八日寧體魄于吳郡大塋之次成公志也公諱戩字天休其先諸姬之

近封冢內者曰鄭後世為大姓偉人六世祖肅經為唐相大中末節制荆南子孫宦東僑占吳下今為吳縣人也曾祖諱思正卒烏程長生大父諱延紹終蘇州錄事參軍大父生考諱文遂卒溫州巡官舊門自令薄宦不屑慶氣回復繫公而發及陪樞幄貢寵三世曾祖贈太子少保配吳氏封太康郡夫人大父贈太子太保其配沈氏其繼方氏封吳興京兆二郡太夫人祔室累贈太師中書令以廣平郡為妣沈氏夫人湯沐公少孤穎特

骨法峻異伯氏載吳士之望器公殊于他弟從學官下
尤能自力及壯志業磊落不為諸儒章句通訓詁大義
莫不造聖賢之韞屬文雅麗學者嚮慕焉遇醉抵西山
下亡何暮夜大水失道有父老自叢祠中出翼公絕流
乃免已而環顧忽失所在久之從淮海遊京師時翰林
楊文公號稱辭宗名有鑒拔篤于獎進故賢士大夫日
遊其藩公以縫衣謁前見賞英峙一面若舊許以棟輔
延置門下介于諸公歎愛其文謂為入室公名所以藉

甚貴勝先達皆忘年願交者以文公器而揚之也于試貢部輒不在選中處之泰然自待益厚上肇位二年始延見方聞之士擢公甲科釋褐太常寺奉禮郎簽宣德軍節度判官親嫌移宣城故相李文定時守金陵薦公材堪器使秩滿召試學士院除光祿寺丞集賢校理未幾通判越州代還改太子中允同知太常禮院泛恩遷太常丞踰年除三司戶部判官賜緋衣佩魚受詔注釋御製三朝寶訓遷直史館景祐初同修起居注改太常

博士繼為開封府發解官及攷較御試進士與今翰林
宋公子京建議禮部所行韻略及廣韻繁簡失當訓詁
不正有司攷士多以聲病被黜請修三韻是正音訓書
成學者便焉改判鹽鐵勾院為聘契丹使首還以正言
知制誥賜紫綬時西臺之選極一時名勝故景祐中
號令溫雅辭訓深厚者公豫唱焉層構落成聯章數請
上親用籀法書紫微閣三字以揭詞掖且旌名臣領判
國子監以謂教化根本先京師而後諸夏乃選明經義

誦說有法者以訓導胄學復乞田以給之又請立學州
郡以廣育才五年同知禮部貢舉多拔名輩務略小疵
翕然稱為得人寶元初知審刑院讞天下之獄原心麗
法值帝長者多所全活無留牘前後四被詔獎從容訪
對去必目送自是簡注日隆未幾除起居舍人龍圖閣
直學士知開封府豪吏馮士元挾狡數通貴要多為姦
利睚眦必中以禍操制一府畏甚于尹都人目之為立
京兆公廉知罪惡窮按姦賊悉得其受賂撓法之狀權

貴多為請者了不以聽獄具奏流海島家沒償贓首惡
既除餘皆股慄註誤及愚弱坐法多見貸舍即豪右犯
法必連治窮按無所顧避而轂下政清康定初高選主
計命公權三司使事先是居計席者未暖輒遷不暇講
求財策吏治益弛計文寢耗至是四方用武急于調度
公檢多門之蠹抉辟召之非勅正簿書參比經入民不
加賦未久得羨緡四百萬轉運使舊有攷課之法廢格
不行公請復舊制以振綱領時邊兵六十餘萬坐甲待

食軍興期會急于星火公迎事輒辦臨劇益裕上圖公展成之效謂終足負重任斷大事乃拜右諫議大夫同知樞密院事尋改樞密副使舊制二府進律錫予優豐公以甫畢前恩堅辭後賜許之既參前箸之訪所以代謀制勝者甚衆嘗入白虎帳議遣高材使者就問西北諸將攻守所宜使悉條其策謀且探觀其識略能否足辦緩急可任上用其策焉時黠羌擾西縣官旰食一日上召對二府問有唐大臣巡邊故事因言寇難未夷師

老勤成欲煩吾一二舊德往撫西衆因以圖上方略大臣未有對者公自惟布衣主上拔從羣右任以本兵思欲畢力竭忠圖報乃已即時歸第手疏請行上亟以公疏付中書深為當國者忌憚卒見沮格明年遂以本官資政殿學士知杭州公出無他了不自直至是過家乃散百金悉召見故人親屬醺牛酒以上冢先是詔謹內盜大籍四方鄉丁申勅部官閱習武技時西師新喪東人大恐謂將取以戍塞日夕悲涕公檄以諭父老復奏

減其半使還田業自是人心甫定郡中西湖即白傅所
記錢塘湖也環三十里溉湖上良田千頃唐相李泌即
湖中作陰竇引水灌城中六井以資汲者武肅置撩清
軍以疏其惡自錢氏納土至公居郡凡甲子一週矣而
湖穢不治豪奪以耕僧侈其構浸淫蠹食無有已時公
按舊記復故堤程工無慮十萬調境內丁夫闢之湖利
中興焉二年除給事中移并州未行改鄆州鄆齊等九
州安撫使冬移長安兼本路兵馬都部署規中入覲從

容言羌寇逋誅陝服寢困宜勅有司計料調緩急差為三等軍興急須自如法他可緩以期會非急者一切可罷以明恩施上深然之至雍復表西人瘡痍宜在寬卹因是曲為降赦諸更徭賦斂傷害于下者類皆施行公議以紓民力又奏罷括糴之法誘邊人蓄粟以平穀價吏自渭涉河輸木京師漂沒備償及不中程者至破家產公條寬狀歲裁減二十餘萬是時羌未悔過兵連不解侵軼疆候虔劉邊城天子覽宣王大雅之詩思召穆

中興之將博採文武枚卜公卿進厥帥臣付以西略以公有已試之效有納忠之先三年除陝西四路緣邊兵馬都部署兼經略安撫招討使遷禮部侍郎受命上道老小叩馬至暮不得前因夜半馳去衆復詣闕上書願留時邊將新經定川之敗士氣益奪公建上將軍旗鼓盡護諸將合衆軍于涇原健銳者訓勵之疾傷者安息之拊循嗷咻人皆自奮元昊擁衆黑山號稱十萬公行邊抵鎮戎勒兵趨蓮花堡進據險要天寒置酒高會虜

不敢近自是軍聲始振邊寇絕入時邊部將利邊境有
事用公錢亡節緣賂售進收私入已無名之費不啻泥
沙公私疲勞遠近嗟毒公擿其尤不奉法者斥逐去郡
餘稍自戢四年疆事稍閒詔公還治長安養持威重雍
人若幼若父重趼數百里拜迎車下部中適旱踐境即
雨衆喜曰此涇州雨隨鄭公來也初帥四路有生氐帥
烏寧率諸帥願奉水邈地入附諸氐亦獻山林願得內
屬水邈直隴坻之右自石門西出臨洮趨秦中為近二

水環城而遶帶河渭雜氏十餘萬落無所役屬往時名將自曹武穆等欲城其地而不可得至是公遣靜邊戍長劉滬觀相形勢滬還勸公亟城天贊之機不可失以資賊即以狀馳奏遣滬往城以從軍董士廉尸其役會公移雍涇原帥毀沮其策即日檄收水邏兵趣使罷役滬士廉守便宜不從公爭之甚切上遣三司副使魚周詢宮苑使周維德同都轉運使程戡行視利害涇原帥以滬等不應令遣將械籠于獄將斬以徇羣氏遮使者

車稱寃使者即時出滬等還奏城便詔趣訖之城成賴
其保障公復謂環慶涇原二路相去道里回遠緩急首
尾勢不相救又敏珠彌臧康努三族隔閼其間首鼠援
賊昔孟獻營武牢而鄭人懼晏弱城東陽而萊子服若
城細腰奪賊要害遇有警過師猶在衽席之上雜種畏
懼亦且不敢附賊賊無鄉導必難內侮召部將种世衡
蔣偕程工計日度三月罷業已版築會公解帥公度失
今不治必開後患志在憂國表上其事未幾宣撫范公

來西詔下城之如公所策凡斥境數百餘里是秋戎人
詣延帥送款西方益無事五年上書乞守內郡朝廷倚
其名重璽書勞勉天王都汴根本兩河晉迫羌胡土俗
勁悍大鹵謀帥無易公者六年除戶部侍郎資政殿大
學士知并州兼并代澤潞麟府嵐石沿邊經略安撫使
兵馬都部署時甲馬隸麾下者凡十二部部將有貴門
有寒族所部之兵及所給鎧仗其間精怯不等公慮怯
者遇敵勢必先敗敗則牽沮大軍非便于是均配强弱

合置十將自往訓勵并無武鋒精兵復閱廂軍精勇者
得三千人遷補清邊聲其數為十萬以夸戎人潛遣戍
兵還京師者數萬衆獲休息幾減邊費半吐渾守捍尤
力自諸校而下名級間外得專補署不從臺請庸人建
議欲從補別部公上言士出死力者以有分寸軍賞人
情戀本不宜輒動詔趣從舊制澤潞遼絳之賦移餉河
北公以瘠土賦不足以自支奏罷外輸以寬四郡帳下
吏浮冗者裁損四十餘人以省經費邊將爭遣人覘敵

被遣者貪利財物實不能得其要領還即紿言以報敵
欲為寇邊郡承謬至發奔命書以疑誤上聽已而卒無
纖介了不按問公懼習玩啟慢備豫不逮因下令諸覘
虜不實者論如軍法自是不敢紿報多得實而還契丹
之將討夏人也造船于天德軍或曰敵態難常我盍備
之公曰師出無名匈奴本以甲馬戰鬪今爭舟楫之利
是棄長技而取所短彼將取敗我焉用虞後契丹果以
敗聞二國之將戰也邊部警奏重迹而至獨太原不發

羽書上怪問公狀且詢之策公曰外國自相攻討不足
煩中國慮願勅邊將務在持重而已麟府熟落經寇驅
率略盡公招還離散撫綏荒餘益弓箭五千浮二萬戶
以實塞下空虛之地以耕河上良腴之田以口益增歲
糴彌賤苛嵐軍東草城川近壓邊境隋大業中置戍以
扼賊衝彼貪地肥間出田牧公與約地距塞二十里內
虜不得預徙實邊雜戶數萬家以為扞蔽中國限戎本
以豐之橫陽川為限豐州沒後城主失戍元昊既已送

款因遣人請沒寧浪地公上言麟府孤立介在河外若以美地資賊二州乃墮其吻終為吞噬臺議遂不肯與戎人請之益堅復因使者附奏具道不可與地狀卒用策諭還西人公治尚嚴明天性疾惡并土年少喜伺姦便公設耳目知其主名窟穴犯者輒錄窮按株連自是姦盜衰息在杭雍亦然惡子皆逃之他境狂卒以甘陵叛訛言寇且至晉人乘之洵懼推迹所起乃定襄男子為之因戮以徇遠近帖息壽陽豪李化殺人誣郭鸞以

規免鷹不勝楚掠因自誣服公察非是詰化化詞大屈
鞠之具得其賕買真狀化卒棄市邊地寒苦囚多噤死
于獄公奏條元魏恤獄故事上惻然降詔自是繫者涉
冬多活鐵錢惟輸關右後河東亦施其法晉地產鐵人
爭冒鑄犯者殊死日報而姦不止公論作法之弊請用
三當一以消姦源上選近臣通政事者參議經久咸是
公議改幣令下姦人不悅羣訴公所守卒不納有噪于
牙門者公坐黃堂使前諭以幣輕物貴盜鑄多死朝廷

所以改幣使重禁民為非者正是全活汝輩何乃敢拒
明詔因執渠魁不率教者致之于理是日間巷無賴者
輒掠奪市物公勅牙兵收捕竄首惡十餘輩自是姦鑄
遂息物價益賤于今受其賜秋冬閱材官鄉義二十餘
萬號令明賞罰信旌旗鉦鼓風行電照故太原遂為天
下勁兵之首苛慝不作威名播越朝廷以公威名累稔
底定有勞七年除吏部侍郎未幾拜宣徽北院使檢校
太保仍判并州事公表陳孤生感會明主倉卒之際謬

奉馳驅幸賴國家之靈邊隅訖定兵官猶可併省微職
不宜外除固辭殊章願守閒郡優詔不之許天子以公
忠力外宣功效尤著明年就拜奉國軍節度使復表陳
前志自言衰疾不任軍事願還節制手疏懇到卒不得
謝久之寢劇以至薨落年六十二士大夫多為流涕公
外濟以和內果于斷個儻以尚風誼慷慨而好功名精
力過絕于人英詞鼓動于物尹都府幹大計二職竝劇
萬事倚辦老吏持案待決訟者操契滿前准量錙銖判

別皐白神無滯用機應不差旁接談賓行答尺牘毫法
俊健書意婉文理盡親疏體甚閒暇參以善謔杳然虛
舟前史稱發百函占十吏殆無以過也有一善既稱道
之不舍又申以獎拔故出門下者多臺閣名彥貧賤有
舊接之者驩然有恩為振其乏在宛陵收塋故人孫漢
經恤其孤楊文公高直忤時天禧間愈不得志及卒賓
客益落公病方困吳郡日夕馳走赴其塋義士避之伯
氏吏部代還左蜀病卒岐下公時在西省請急赴喪大

感于行路及在軍中士有疾病行自省恤軍市之入厚
于犒軍下伍有勞多見拔用纖微坐法闊略不問故衆
莫不思奮焉嘗讀兵書至謀攻篇善用兵者屈人之兵
而非戰也因嘆曰上兵節制要在靜勝故每檄諸將常
以堅重待敵終能制戎羯安邊境者繇此策也惜其在
樞宥日淺謀謨未究服勞于外益從而北不得推所蘊
于天下每處邊議多蒙報可前後詔書褒寵凡十八至
焉奉公憂國遭時得君若天假之年授柄以相其老謀

遠業猶將安生民強公室烏肯管晏而休耶公撰著文章凡五集曰制誥原武紫溪長安太原總五十卷才高而兼華實文雄而有氣骨蓋人倫之華衮而材林之傑藻也攻詩出于餘力尤極清麗與故翰林葉道卿夙期相許心照莫逆篇章酬寄別為一集以訂元白云道卿出守河陽自太原寄詩四十韻以將篤好葉復次韻以答詩成未幾物故世傳名句絕麟于此公聞河陽之訃慟哭不食者數日力疾捉筆以銘道卿之墓纔百餘日

相繼薨殞同時塋于吳下神反郢質近時少比范張款
款復存今日夫人李氏贈都官員外郎昌言之女賢有
至行生于名門協濟高明參穆內外累封丹陽郡夫人
男子五人民彝民初民秀民慶民用竝太常寺丞太祝
咸有學尚兼資才令六孫估佾倂倂億億皆秘書省校
書郎二女長適三司鹽鐵判官太常丞直集賢院王珪
次未嫁上錄其家若子若孫及別族者凡十人及諸婦
班簪鎮者八人賜晉陵解舍一區以郡幹給使公九歲

即失怙恃念及泣然常欲以感慈之名置寺塋側未及
請而薨家丞緣雅意以聞詔賜之榜且有別旨間歲度
必芻一人以虔香火忠義獲寵哀榮異常如公者鮮焉
臨薨語家人見託銘墓左右或泣下公諭以至數勅勿
悲神明若茲公為不亡矣宿疇昔周旋平生獎勗見評
州里預游藩牆契闊限于死生頻仰成于今古緒言有
屬感涕無從輒稽宗譜之傳與夫官簿之實寄通如在
傳信無窮銘曰次舍之精歲昴著明東南之鎮秦稽蓄

靈巖巖文肅王佐之英精明卓傑降神及星惟天右民
付畀間氣帝初器之使材諸位曰訓曰謨以經以緯尹
茲都畿相我邦計萬事倚成三邊仰濟名赫厥聞功昭
于試若時用武惟密本兵選衆以舉好謀而成憂勞西
歎感慨請行見排異已實貫神明忠圖未究讒言其興
屏毗于外允一乃成前疏未乾上眷攸注卒帥于西授
以節度宣明國威剷除民蠹生民奉圖析肝願附水邏
往城細腰白戍我闢我疆之策之慮上緊睿明弗為讒

沮荒憬尋柔壘垣增固復來長安益從太原厥戎孔邇
其武惟桓臨御以重拊循則寬悉復棄地大徙實邊歲
有高廩時無姦錢長城屹若敵國隱然惟時念功節旄
即授告于文人鉅鬯一卣曾是偉賢胡不大壽奄忽棄
藩弗究其有晉人涕洟用懷孔疚如蒼生何公亡于牖
公雖云亡名不得朽雲棲迷兮大鹵水幽咽兮昌門從
先公之舊兆啟茂苑之鮮原穆將安兮真宅些歸來兮
英魂慨梁木之其壞感華屋之生存武丘兮北峙凝嵐

兮夕昏嗚呼雄俊儒帥鄭公之墳

文恭集卷三十六

欽定四庫全書

文恭集卷三十七

宋 胡宿 撰

誌銘

宋故奉直郎守侍御史王公墓誌銘

慶歷乙酉上用太原王公為侍御史數進方幅切廟庶
政又明年以天禧故事參領諫職臺中雜細一不復省
顯繩違納輔而已公強學精志多識前載孝武時倪寬

以經學進建武中杜林以名德用公膺時學其殆幾乎
九月十三日對延和殿敷敘未究疾作遽退明日卒于
家治命葬于潁上聞盡然傷之法賻有加復錄其子向
為三班借職且曰使有祿以養其母恩從特出例前不
著葬有日矣諸孤條官闕世譜託銘于學史者且云友
也義不得辭公諱平字保衡五世祖唐末避地自徙居
閩之侯官王審知之據郡也曾大父隱晦弗仕常署大
父為安遠使已而謝去考諱居政以行義稱于州里娶

姚氏早亡繼室以陳氏及公有位于朝陪祀延漏福室
官至祕書丞以昭德仁壽二號為繼姚封邑之寵公生
而穎特少挺淳至十二歲丁昭德之喪號慕焦毀不能
自存大父敦譬益更感絕後與從弟甲同研席相友愛
久之游學不利春官試還客江淮間所至交其士大夫
之賢者好自整飭不妄舉動强于記問有制度之學經
史汎達誦說有法好學者日至其館從授大義諸生奉
幣為謝初不之卻痛節游費還資養具章聖後元年以

同進士出身授許州司理參軍里中女乘驢單行盜殺諸田間褫其衣而去驢逸田旁家收繫之覺吏捕得驢指為殺女子者訊之四旬田旁家認收繫其驢實不殺女子公意疑甚以狀白府州將老吏素強了不之聽趨令具獄公持益堅彼乃怒曰掾懦耶公曰今觸奏坐懦不過一免耳與其阿旨以殺無辜又陷公于不義較其輕重孰為愈耶州將因不能奪後數日河南移逃卒至許核之乃實殺女子者田旁家得活後因衆見州將謝

曰微司理臯幾誤殺人再為臨安扶溝二主簿翰林徐公爽治京府薦其材除開封府法曹參軍董希顏為推官持法喜深公處以正與之背戾滿歲當遷故事闔府保任希顏持奏不署或諷公往謝公曰脫遇知我安用謝為如其不知謝適取辱使謝而署奏交有所喪希顏聞之慚索奏亟署尋除秘書省著作佐郎在職如故初府掾任京司者見尹廷謁未幾泛恩諸掾悉遷朝秩公除秘書丞同府掾佞尹拜謁廷下公以朝有定著引他

掾羅拜堂上識者謂其有體尹後奏罷諸掾有朝籍者
出知洪州分寧縣土多強宗大姓前宰以嫌不之按公
無間然雖賓興未預皆以禮迎見至其家負法雖細弗
貸用是衆伏焉就遷太常博士入為審刑詳議官操憲
甚均持心近厚景祐四年冬地震于晉忻城壞人多壓
死公上書推災異之變大抵言陰宜靜而反動今失其
性四夷之于中國陰也戎狄將有搖叛乎宜勅邊將豫
嚴兵備歲中蠻寇宜桂二州殺守將河西叛元昊入

寇契丹乘間以重兵壓境上求三關故地為言誓外增
物僅乃得止如公之疏云除尚書屯田員外郎通判徐
州未行丁秘書君憂免喪還臺會中執建議諸七十在
官一切致仕之法公以謂古者養老所以納民于忠厚
今士大夫雖不能據禮引去從而斥辱殆非所以為國
養恩之道奏養老頌諷焉不省出通判荆南府遷都官
員外郎守臣操政多任便宜公據法不從以嚴見憚朝
廷高選憲屬于是有臺端之召初石元孫延州兵敗傳

云已死縣官舉贈典錄諸孤已而西人請成歸元孫于
我議者責其不死節請戮以厲後公上言西戎比年犯
塞將校覆歿幾何甫歸元孫隨而見戮是堅降者之志
而絕內顧之望非計之便元孫卒得不誅監察御史閻
詢治王素獄讒者言詢與素姻家匿不自避疑其姦上
立黜詢詢惶懼不敢辯獨公奏言詢妻弟娶素從女耳
論情則至疎在法不當避業已黜詢往河陽酒局然尋
起通判隴州公議論務大體略碎煩所彈應法嘗乘間

為上言人情不能無過且宜闊略細微問諸忠義何如
耳上深納之數條白邊關利害及摘財賦之蠹他日宰
相擇專對者往迓敵使公不在選中上卻奏曰王某識
敵能敏且辯胡為弗遣遂命為接伴使還言河北春月
猶習土兵違時妨耕可趨其會自是鄉兵閱習以兩月
為限斷盡冬須罷除三司戶部判官尋充契丹國信使
至幽州敵方蒐兵試戰聲言伐夏遣其相蕭忠孝來云
元昊侵侮敝邑敢以告諸使唯唯公遽曰南北盟好歡

固踰于金石何讒之能間且治兵有國常事脫吾邊鄙
討貳庸可間乎忠孝既退公之介曰彼妄誕非其主意
公曰不然及見戎王面諭伐夏事略與忠孝語同公拾
前對對之戎王喜規中還奏題其所答廣親邸災公坐
省曹案領修造有詔營繕令主督作廣親秦悼王邸也
年祀浸久支庶彌廣無容室處至為樓居上患其然方
議益邸會其火因度取邸旁民家地以廣其宮悅勸工
徒省約用費有以舊例送錢者公拒而弗納尋代賈漸

知諫事延和之對辭解官役曰臣羈為修造有司今為
諫御史護役于體非是上曰官役垂訖煩卿旬日事耳
公病語不及究猶力疾自退還于牖下以至于啟手足
享年六十三公介而敏造次必于儒雅論議依于名節
與朋友信于閨門孝從弟甲後登進士第與今資政范
公同年生也調澧州司理參軍病卒于京師公哀慕收
斂不啻同產范公高其義往弔之復以同年齒為之拜
雅為故集賢殿修撰曾公會所器妻之愛女賢善柔閒

經是二物以金華為湯沐邑男五人回岡向同問冢子
學有家法行為士範諸子咸保家之令志局叵量一女
嫁光祿寺丞陳臻古以皇祐己丑八月十二日葬于汝
陰之旌義新安里辱公最舊捨我先逝惜其疏遠孤進
晚始得供奉諫諍素所蓄積曾宣濟之未暇一旦奄忽
其命也夫銘曰公嘗游兮潁之湄愛潁水兮清且漪壯
有氣兮陵虹霓冠岌岌兮佩陸離挾時策兮步來西思
綠髮兮殫所施命與力兮不可支與一御史兮衰且遲

驥將騁兮蹶之年不與兮已而望闕樹兮東南涯貧不
資兮葬不得歸循故潁兮水依依丹旒舉兮秋風吹匪
良友兮我孰思有賢子兮君勿悲尚逝者兮有知寧體
魄兮于斯

故尚書都官員外郎丁公墓誌銘

至和甲午六月二十四日尚書都官員外郎濟陽丁公
卒于京師之朝集院年五十四位不配德論者傷之君
諱某字元規其先齊公伋之後于姓為著中葉遷播徙

貫于晉陵曾大父匿景大父衡泌考諱某與同產兄力
學比干試于貢部以不得志先兄而卒平生友愛鄉論
佳焉娶清河張氏其外女兄也賢善為族嫻所美生二
子長即都官其後令終考追贈尚書屯田員外郎以仙
游為母湯沐君幼喪父羣穉見之竦然改觀及長與兄
某俱有才名學者稱二丁焉母疾刲股肉以進孝行聞
于閭里弱冠而孤侍世父尤謹明道中與仲氏比牒充
賦明年建元景祐春當試于禮部會予為大宗伯所辟

預典試事以親嫌移之別屬二惠俱在選中是年同登
乙科里門榮之釋褐甘州軍事判官郡通河西城惡且
甚獻議州將計功治之凡期年而役已未幾夏人果叛
岷大擾城完而固衆以不恐河出州境歲苦災潦營石
堤以捍二者州人賴之廊城宿兵悍吏猶轉運段公檄
使莅劇邑中大治再調楚州團練判官發運使吏部蔣
公舉監淮岸局督是漕事秩滿遷祕書省著作佐郎知
江寧府句容縣幼艾懷其惠老姦憚其明府檄苛求一

不之聽徙知雅州名山以勞免行遷祕書丞三司舉知舒州太湖縣兼權茶禁舊制歲市茶八十萬受上賞前此居邑者淫刑取辦腴民售進積苦甚虐舒人無憐君即歲減三十萬或以為不可歎曰吾寧坐不逮之罰安能邀腴民之賞乎自是無暴征無滯積公私兩便為諸邑之最攷課遷太常寺博士泛恩除尚書屯田員外郎在官五年代還進秩中都通判定州暴中風眩以至含壁君履行修勅性資沖厚犯而不校介而能通行已本

于信誠治民先于愛利未究中壽僅得臺郎報施難原
此古人致論于力命也君娶廣平程氏胙脂田于安吉
柔閒維則以經二紀天死遘閔未亡在痛三子曰某曰
某曰某世其家學休有鄉譽滋而後大庸或在斯女三
人長適進士孫詔餘在室孫男一女一皆幼哀號奉其
柩歸攢諸室參議真宅武進縣懷德鄉薛村原之地命
龜曰吉以季冬丙申寧體魄于茲厥初其孤來赴以葬
咨予內屬銘其前人惟疇昔之晤言慨頹仰之陳迹且

稽遺範以誌幽遠銘曰篤哉斯士履德恂恂氣沖神茂
行安節純忘生徇孝紓患庇民宜餉以福尚永其身曾
是短歷殲此良人爰啟新阡四郊之側言駕輶車來寧
北域脩夜弗陽嚴冬將夕寒日無光陰雲寡色永訣千
秋齋咨篆德深谷有遷茲石未泐

故朝散大夫太常少卿致仕李公墓誌銘

宋有清德美行之君子曰李公至和元年以七兵郎中
典吳郡治成辭疾詔以本官分司南京聽家武進吳人

飲公和政去有遺總後四年告老除太常少卿致仕以
嘉祐戊戌十月二十二日考終命于牖下斂以時服家
無餘帛素絲壹節嗚呼清哉于時搢紳先生相與流涕
痛夫若人之不見已公諱仲偃字晉卿李系隴西曾祖
昇祖璟竝為江南國主考從浦右龍武大將軍公第三
子也生而警異幼即藐孤伯氏仲儀撫養甚篤及長挾
策無流志落筆有奇語弱冠厲節游學知名故翰林梁
公顥文定趙公尚書咸器其才行召置門下所與游者

皆當世知名之士天骨秀爽神情閒遠見之者目為神仙中人祥符中再舉貢部高等八年得進士丙科調楚州寶應尉邑多無賴少年喜為人害前此更不能禁公至則痛繩以法惡子相率改行治以大肅郡守黃宗旦薦其材秩滿授常州團練推官未幾丁內艱服除改澧州軍事推官知蘄州蘄春縣兼監洗馬茶場從三司之舉也會議茶變法商賈輟行踰期不得代書任者四期及還攷課復不應書大理寺舉充詳斷官除本寺丞然

非其志也先是廷尉丞屬多取經生泥于執文不暢法
意惟公儒者常得中典時丞相陳公以綱錯領判尤加
賞待凡有疑讞諮以取正稍遷殿中丞范公密遣諭意
且欲薦之臺職公以索米為解亟辭不願出知越州會
稽縣風政修舉為諸邑最秩滿除尚書屯田員外郎通
判台州近臣有薦公才堪治劇中御史者初除都官員
外郎用知真州未幾召拜侍御史時三院徑路官進者
最稱要捷營此職者多稱道地公屢表衰疾乞郡自障

遷秩司封除淮南提點刑獄司夷退無競議者嘉焉入
為三司度支判官尋除兩浙轉運使賜紫章服居部識
大體總綱目應書即舉遇事敢行不為細苛靡尚皦覈
除工部郎中代還判三司度支勾院假太常少卿直昭
文館充契丹國信使還除刑部郎中淮南轉運使翰林
金華諸公薦公有經術行義當置在左右不宜外遷上
覽奏謂執政曰朕固聞其名有意且召用之丞相以德
行對但年已七十惟陛下裁擇上默然章請置第移蘇

州以便鄉閭自初筮以至掛冠其間四十年所得俸祿
多給族中之貧者嫁娶孤遺凡十許人篤風義重然諾
未嘗殖產治第有田裁一二十廛謝事後稅止官舍泊
如也平生藏書萬餘卷皆親加校正多手抄者日置齋
中閱古今治亂退閒賓客文酒不廢雖晚生候謁恂恂
誘接忘德爵之在已前後推轂拔取寒畯無慮四百人
有至臺省者文集十卷祥符初瑞物仍降時文載郁諸
所著撰華實兼映詩筆清婉殊有思致才馬盡貴仕德

焉蓋高爵終歿少列豈命也夫享年七十七公之配曰楊氏文定趙公甥也賢和作合湯沐原武冢子孝嗣秀州崇德令次子孝直試校書郎女六人長適祕書丞陳操次進士許佺次大理寺丞黃秉次三班借職靳渭次光祿寺丞周延年次長洲尉富翱孫元規太廟齋郎孫女三人尚幼以嘉祐己亥十一月二十三日葬常州武進縣安善鄉合傘里

案字書無傘字疑
飾字之誤音託

初冢子以月

日來赴家老以閼閱見屬宿于公義則師友情同州壤

銘竄之事所以不敢辭且史官以實紀銘曰李自開寶
言朝于京中間踣斃凋落弗榮及公穎特秀世而生仙
風遠韻人莫不傾彬彬其章儀我王國榮利匪懷比辭
憲職不耀厥文有隱其德夸者退慚談者歎息金華薦
論上稔公聞奈如命何乃以老云逡巡逝水奄忽浮雲
天道力命幽遠難分真宅用寧輅車言引治命有詒先
慈惟近背高城之夕陰遡寒郊之悽緊些營魄以安之
哀風流兮頓盡

文恭集卷三十七

欽定四庫全書

文恭集卷三十八

宋 胡宿 撰

誌銘

宋故朝散大夫尚書工部郎中充天章閣待制兼
集賢殿修撰知越州兼管內隄堰橋道勸農使提
點銀場公事充兩浙東路屯駐駐泊兵馬鈐轄溫
台明越衢婺處州等諸州軍并都同巡檢兵甲賊

盜公事護國軍清河縣開國男食邑三百戶賜紫
金魚袋贈工部侍郎張公墓誌銘

嘉祐二年春天章閣待制兼集賢殿修撰張公以靜退
之性勞侍從之事聞東南佳山水而會稽第一章請自
效詔俞其往在郡三歲政清民恬方且合符歸奏計于
天子無何暴疾以已亥七月丙辰卒于州廨之寢郡邸
奏公計仁宗盡然傷之亟命錄諸孤賻其家所以惻近
侍卹師臣之後焉嗣子奉公喪還京師權窆城南園舍

攷卜龜策得癸卯十月丁酉之吉葬河南之登封從丞相文懿公瑩治命也公諱友直字清卿晚更字曰益之其先世系翰林葉公撰文懿公誌刻詳矣曾祖裕試金吾衛長史莅陰城監院乾德中榜陰城為軍今光化是也遂占籍焉大父廷節養素隱德為鄉丈人及文懿公貴並累贈太師中書令兼尚書令封楚齊二國公曾王妣胡氏追封燕國太夫人祖妣趙氏兩龐氏李氏追封魏韓魯越四國太夫人禰廟士遜開府儀同三司守太

傅鄧國公致仕薨贈太師中書令兼尚書令謚文懿公
王妣蔣氏黃氏封鄖鄧二國太夫人馮氏許國夫人公
文懿公之長子母曰黃夫人公生而骨法奇峻體性和
厚少有學尚尤修志介文懿公任壽春郡王友友直七
歲以蔭補太廟齋郎非所好尋除守將作監主簿三遷
監丞館閣讀書再授詔編三館書籍天聖中以本官充
祕閣校理同知太常禮院明道初特賜進士出身遷祕
書郎文懿當軸自以丞相子避遠權勢出通判蔡州歲

餘移倅鄭下時文惠陳公以碩老鎮圃田屬公以州事
公以悉心無所遺力及文惠入相薦公于朝直史館遷
太常博士同管勾國子監事康定初充三司鹽鐵判官
改判都磨勘司慶歷初除尚書祠部員外郎知襄州甫
至郡而張海賊起且壓境上公治州兵募丁壯得敢勇
願行者數百輩令邀擊穀城多斬首級賊潰去後為比
郡禽翦首挫銳氣繫公之力丁內艱去郡褫服除舊官
與職歷判戶部鹽鐵二勾院遷刑部員外郎史館修撰

文懿公薨釋服除刑部仍前修撰嘗感蔣氏妣卹典未及表讓史職移慰先慈從之詔以鄭為太夫人封國上以捐已為美仍換公集賢殿修撰成美志也糾察在京刑獄改判尚書刑部嘗與侍講學士錢象先奏事便殿已而上目送公謂象先曰張友直占對容止宛如其父其見賞待如此以先公冢舍甫就表碣未立章累上求便郡出知鄧州入辭之日仁宗遣中使至第以舊德之碑四字篆文懿公神道又賜公御書飛白及鳳茶以將

其意眷焉南陽民饑捐瘠者衆官有儲麥轉運使以便
文自營而不知卹公發廩以救多所全活還朝除天章
閣待制修撰如故尋出知陝州代還侍宴于集英殿公
坐侍臣猶衣五品服仁宗見之愕然遽命取三品服即
御前以賜公拜手謝殿上觀者榮之至是出知會稽越
俗奉竺乾法為龍華每歲又大祭天于塔廟僧俗士女
雜然並會施金帛者趨走之惟恐其後公下教一切禁
止舉籍羨數入學談者避之卒時年五十八至今會稽

父老猶懷其清公莊重介直濟之以和明道寶元之間
文懿公三入相進退天下士公時在子舍應接賓友談
間未嘗及時事雖密昵屬不敢委以私無他恩紀故譽
亦鮮焉惟雅識者重其潔慎文懿既上相印告老于家
公晨夕侍旁將順顏色孝性謹如也家人入息乃敢寢
焉文懿公薨時年過八十公哀毀骨立生平薦任子弟
必先疏屬及其亡也幼子未有官公精小學能篆籀喜
楷法尤好篇詠得美書善本必手自傳寫色無倦焉仁

宗在東宮起居語默文懿公必疏記之祕世未有知者
及薨公類以成篇目之曰資善錄出南陽日從容面獻
之上甚悅詔藏諸太史氏有文集十卷公娶劉氏度支
郎中明恕之女柔慈賢善凝範六嫔封宜陽縣君嘉祐
明堂以子在朝著進封長壽縣太君贈公工部侍郎子
八人德淳尚書屯田員外郎德潤內殿承制德源大理
寺丞德溫大理評事德演太常寺太祝三子早喪女十
二人長適起居舍人知諫院呂誨而亡次刑部郎中集

賢殿修撰陸誥未嫁而卒次適司封員外郎梅清臣次適太常寺太祝王端臣次適宋彭年三人天亡四在室公之將葬冢子以日月來赴且求銘于石宿雅出門下復與公游冊府以茲分義誠不可讓文斐無次今但直記其實云銘曰巖巖鄧公俊德之雄三陟台衮告老顯終有哲者嗣時惟冢子雅行敦修端誠率履炎炎相閣赫赫洪爐視權弗有處勢若無和而匪流介然弗倚四臨厥藩其清如水年塗才半志力尚強曷云與善乃爾

殲良履鼎原兮開阡面松峯兮寧體陪真宅于先公尚
慶靈之彌啟

宋翰林侍讀學士朝請大夫尚書右丞提舉萬壽
觀公事勾當三班院上柱國隴西郡開國公食邑
二千五百戶食實封六百戶賜紫金魚袋禮部尚
書謚恪李公墓誌銘

嘉祐己亥冬十月上將袷享太廟前三日庚午齋于大
慶殿翰林侍讀學士尚書右丞李公入侍帷幄次屬疾

大困有詔易人侍祠告許還家治疾乃輿歸崇慶坊之舊第翼日上命謁者臨問復馳賜湯劑聞其未平也又敕中使太醫往視既而寢劇癸未卒于正寢訃聞上恫悼之命內史納書以禮部尚書告其第法賻加等公諱昭述字仲祖其先鎮陽人也曾祖沼國子毛詩博士贈太子太師祖昉太宗朝宰相司空致仕薨謚文正累贈太師尚書令韓國公考宗諱章聖時翰林學士累贈太尉並國史有傳公第二子也幼而風性機警神清穎秀

文正公常以吾家寶器目之居母清河郡太君張氏喪
刺血寫佛經毀過成人年十五能屬辭學通志立太尉
屢欲任之官比辭不就移讓近屬卒被敦迫起家守祕
書省校書郎其侍親也孝于承順省視飲食起居無不
適其意者典幹家事大小皆有倫脊丁太尉憂號瘠在
疚恩例改太常寺太祝服除召試學士院賜進士出身
監內香藥庫嘗奏局事進對詳敏真宗目送之既而謂
左右曰積善之家固之餘慶遷光祿寺丞薦充刑部詳

覆官秩滿除祕書省著作佐郎通判越州遷祕書丞樞
密使曹利用薦其材召為羣牧判官汝人隱障牧地吏
不能究受詔按視舉籍鉤校凡括實數千頃時議伏其
精遷太常博士知開封府開封縣未幾遷屯田員外郎
為本府推官坐舉將曹利用被譴出知常州治稱仁平
稍遷都官員外郎入為三司度支判官上言五事朝廷
嘉獎充契丹國信使再遷封泛恩除工部郎中出為荆
湖北路轉運使荆南屯禁卒譁言倉粟腐不堪食公命

掌廩者給為已俸因會客日試取作飯舉匕而盡曰孰謂不可食耶譁者遂息范諷貶武昌公素厚善以嫌移湖南路虎翼戍卒長沙監軍遇之酷一軍憤欲搆亂或指公辭舍曰奈李公何我不可以負長者事遂寢公聞然猶未信因戒監軍不復敢暴他日還都其衆遮道羅拜指妻子曰向非公無噍類矣因感泣而去還朝除淮南轉運使兼發運事直史館賜紫章服奏計京師以漕職修舉移陝西轉運使邊圻久弛元昊以夏臺叛至是

增屯戎馬五倍于前上慮邊餉不支遣近璫問狀公潛計度以必辦對晝則與賓客談宴閒泰如平時暮夜立吏于前口占以策黎明移文盡出兵食乃集移河北轉運使覲日上諭其勞留糾察在京刑獄尋除三司戶部副使受詔經制陝西糧草因以安集土兵還為鹽鐵副使嘗乘間奏事疏笏為記上屢目之公指笏以對條奏益詳除諫議大夫河北都轉運使至澶淵值河決斷浮航具舟欲濟而風甚公禱于河風息遽濟至北岸而風

復作後舸皆不得渡未幾契丹非次馳書遣劉六符來
使朝議懲澶壁之惡公受旨以完隄為名選將吏調兵
農八萬城之踰旬而畢初戎使之過澶也第且治隄及
還覩雉堞城守之具頗備甚駭愕初詔置義勇人情訕
懼公乘疾置日行十舍所至開諭父老置軍之意卒置
義勇如詔書焉安平有文正公膏腴上產歲租入簿深
守按鄉原租例索主者質劑歲願附益二十萬錢公辭
之曰租乃大門所定脫有遺利義不敢受郊吏獻計減

保塞軍濫食公重于裁損遂弗納及公移澶後保塞軍
亂如公所慮焉宣撫使任中師表治行詔書嘉獎除龍
圖閣直學士移知澶州遷給事中代還領三班院秦州
言糧道且乏不足支數月除公樞密直學士陝西都轉
運使至即開入粟之策發輶車之運塞下實焉尋及近
藩未報無何掘地得古銅符文曰許昌詔下治許郡中
西湖名勝引為曲水日與參佐觴詠亭下餘力治礮迄
今賴焉期歲移亳州河北四鎮初置安撫以公充使領

真定路兵馬都部署之職知成德軍歲饑籍僧廩羨粟
萬斛官作淖糜以救所全活者甚衆武衛悍卒亡為盜
城中恐懼公密遣帳下十卒翦戮之信宿被遣者梟六
首而至自是將屯肅然無敢逸者西山聚盜肆害累稔
下教諭以禍福未幾以罪自歸除尚書工部侍郎龍圖
閣學士充秦鳳路兵馬都部署經略安撫使未行詔再
任成德其後秦中闕帥范祥城古渭戎落大騷議者謂
公若在秦決不生事擾邊遷刑部侍郎還朝領三班院

會置三輔除翰林侍讀學士知鄭州是年秋歸侍邇英閣知通進銀臺兼門下封駁事判太常寺兼禮儀事提舉萬壽觀領三班院再遷兵部侍郎尚書右丞至卒年九十九夫人曹氏故楚王彬之孫贈中書令瓌之女賢明令淑以經內外湯沐鉅鹿為夫人之封先六月而逝息男六冢子正卿卒大理寺丞直卿左班殿直宜卿尚書職方員外郎上卿殿中丞二子幼亡巨卿未仕益卿守祕書省正字息二女長適文思使任昱次適東上閣

門使張希一十孫士彥士方士立士燮並太常寺太祝
士亨士褒士衮士稟士奭並將作監主簿士忞未仕公
夷粹開敏外寬中勁怒而不校和而不流生于貴勝恂
恂如也朝廷儀範事典多所該識家世七葉爨無異煙
門內之治有規治尚仁恩休澣宴集昆弟姪在焉必以
孝弟學行從容勸導未嘗言及資產清素孝謹為舊族
之冠嘗言我家三世學士論者以為美談吾歿後汝等
勉之無墮素業性有巧思精于曲藝通音律善弈棊家

有名園尤善種樹珍叢嘉植周阿而生親朋之來罇酒
相對歌詩筆翰自守家法不為時變有文集二十卷領
使凡七臨州者六識大體略細苛不以皁覈取名主于
忠厚而已薦引多拔寒畯往往不識其面推轂數百訖
無謬舉之累豈非誠歟族黨治喪墨龜以告卜明年正
月七日惟食舉鉅鹿夫人樞合葬于河南府河南縣諸
葛村之原祔太尉之塋兆于昭位家丞以世系官次請
銘于石宿辱公之舊得撫其實銘曰李之根系成紀姑

臧滋而後東趙郡贊皇益從而北厥惟鎮陽日西者李
仍世其昌有覺賢公時惟文正相我太宗光明熙盛英
英翰林風華是映器于真宗垂付以柄慶源之濬回復
在公行本諸孝性安于沖正固以幹開敏而通治家有
篤順睦其風六殿于藩七漕其職北土置兵西師調食
既勤諸神亦勞厥力治略其苛政幾于德蚤更近職晚
侍邇英禁林三葉未有茲榮同庖七世弗忝爾生闔棺
于寢愍策以卿曷不期頤遽然寔窆九鼎舊原萬安先

域體魄寧茲輟嵩在側爾雲爾來重圭亾極

右監門衛率府率世堅墓誌銘

太祖皇帝三世孫右監門衛率府率世堅字溫其慶歷
戊子十二月二十六日以疾卒于睦親之吳邸年若干
有司以品卑不在詔塋之例上憐之惻然見于玉色特
命入內供奉官梁克明往護喪事以黃金五十兩白金
三百兩賻之令內史卹詔贈以右監門衛將軍公曾祖
吳懿王大父某永清軍節度觀察留後安定郡公烈考

從審寧國軍節度觀察留後宣城郡公母渤海郡君吳氏公幼性敏悟長有學尚筆札工賦詠有恭順之志無怠惰之容日奉內朝翼如也稱為老成謂將遠到初命猶隸三班廷臣景祐初大更宗室官制纔除率府率至是再遷而卒君以天屬生王家不秀而苗既榮而隕痛矣夫公娶李氏贈尚書令隴西郡王繼勳之女孫東頭供奉官舜舉之息女育二女並幼初藁葬于某所嘉祐庚子十月癸酉葬于河南祔永安之封城

案此下當有銘原本缺

虞曹郎中妻

案郎中不詳姓氏誌文亦略而不載疑有脫漏

故陳留縣君

鄭氏墓誌銘

慶歷乙酉二年甲寅陳留縣君鄭氏卒明年自晉陵舉其柩歸族南譙之墓且祔先姑之次以十月十五日辛酉窆之于清流縣蓼湖之原筮曰甫定家老以鄭之世系請銘諸窆謹按宗牒鄭蓋厲王之支子始疏華下之邑乃在窆列之內周之東遷我實從焉再闢虎牢之封厥居榮園之地春秋之後布護蕃衍漢晉之際咥赫盛

大或革履見識于上或雲屏分間其坐司農二學名于
當世有唐四姓號為盛閥因亂僑寓今籍定平曾祖纓
贈漳州團練使祖彥華仕南康領九江節制歸朝歷右
千牛衛大將軍贈上將軍父文寶兵部員外郎累贈工
部尚書沈毅倜儻好談兵策淳化至道間總領陝計經
略河曲功不及究議者惜之事具國書及南陽文公所
撰之銘縣君諱信陵字仙儀即兵部之息也間華令淑
稟諸自然端粹莊修蓋有餘裕以守龜之吉年十六歸

于今虞曹郎中清河公偕哲人歸冢婦虔共上下參和
內外德性之尚不妄喜愠以禮防持動適中節召南采
繁所謂能守法度者陳留有焉天禧初以郊類之慶用
朝闈之例封滎陽縣君前後泛恩進封管城永樂千乘
陳留最凡五邑享壽六十五三子長次津太子中舍次
次立擢進士第試秘書省校書郎次次道太廟齋郎咸
貞惠以承世德開敏而續門業孫三人塾堅學皆幼一
女適著作郎直集賢院呂溱虞曹之止臨海郡印歸老

晉陵陳留深鑒止足內相然贊及得可詔相隨還西翩
翩二雛接翼而歸方將優閒家門含飴弄孫先露奄忽
惠風已而豈至數之常然信天時之不齊銘曰榮園之
姬國曰鄭後世衣冠為大姓東南避地藉延年累葉相
仍覃厚慶惠風勝範在陳留姿度莊修循德性清門合
作三紀餘內外參和資輔正川上之水何悠悠韶華委
逝不復留人間華屋去北里江外丹旂還西州仍從先
姑安舊隴永託松柏山之幽

文恭集卷三十八

欽定四庫全書

文恭集卷三十九

宋 胡宿 撰

碑表塔銘

宋故朝散大夫尚書禮部侍郎致仕上柱國樂安
縣開國侯食邑一千三百戶賜紫金魚袋贈吏部
侍郎蔣公神道碑

宋有大雅全德之老尚書禮部侍郎致仕蔣公以皇祐

六年三月辛酉考終于吳郡靈芝坊私第以至和元年九月乙酉葬于吳縣堯峰之魯塢門人邵必誌其壙議者謂公朝廷偉人東南首望宜有石刻以表神道既葬十年宿得以申尋遺烈章示于後公諱堂字希魯常州宜興人弋陽本系出于周公義興至唐蔚為盛閥累世紱冕訖于五代本朝未有達者先大夫賢常有中興門構之志聚書延客以教諸子公在伯仲間穎特秀整不勉而學益進既冠而業大成西遊京師遍交英俊卓然

文行見稱諸公名聲飛翔迅于六翮祥符五年登進士
甲科授楚州團練推官嘗權州事閱器仗牙門軍校不
待白已輒啟庫鑰公械而治其罪郡中肅然丁先大夫
憂服除吏部試甲乙判文在優等陞見日章聖命取所
試判視之嘉賞焉改大理寺丞知撫州臨川縣縣有大
姓李甲積為民害乃復僭擬亡制動作不法前宰無敢
適其罪公至緣事捕治之盡得其姦狀卒坐棄市害根
鋤去闔境慰悅歷眉吉楚三通判改太常博士知泗州

惟眉差小而三郡類劇沛然神用治罔弗舉召為監察御史時樞密使張耆章聖藩邸舊臣嘗有德于獻后后方臨朝耆數移疾弗治務公以其慢朝虧職宜加顯黜疏比上不省及仁宗復辟同僚語公盍辯前疏答曰彼已失勢言之傷薄吾弗為也未幾同僚躡公前跡而言疏入之明日仁宗見稱敢言擢居近侍執政知公抗疏在前他日見之有慰安之語公曰言責本職豈規賞耶禁中火有司欲文致其事委罪宮人公上言火災天意

也陛下恐懼修省猶恐未至如聞吏議欲以宮人為解
女子一問即承然天可誣乎上悟遽命原之日官上言
內酒坊直國家福德所在宜徙置他所宦者喜興作希
土木之賞隨而贊然事下公府公逆奏曰內酒坊枕大
內西北隅四世矣祖宗以來少福德耶無名改作所宜
慎重事遂寢歲餘遍歷三院判三司度支勾院賜緋衣
銀魚時三司使范諷高虛廢務公以為憂頃之以侍御
史出為江南東路轉運使辭日面陳諷放逸不事事大

隳厥職仁宗頷之未幾諷罷至江東數月會朝廷廢江
淮發運使均歲漕錢帛之數取辦六路以公為淮南轉
運使兼發運使更張甫至綱目未立凡百經制出于心
術歲終奏計六百萬璽書褒美焉未幾就除尚書吏部
員外郎復以勞賜金紫坐部吏犯法按舉失實移知越
州漢太守馬臻所治鑑湖在焉無慮溉田八千頃至是
越人奪湖水以名已田故水日堙湖田日廣貧民失水
利豪姓擅地產公條奏利病詔復為湖俗信姦巫奉淫

鬼境內所祀非舊典者皆翦治之取其像棄湖中材瓦
悉送官衆初駭以為蔑神公乃尊禹祀新馬侯故祠歲
時齋薦之民靡然而趨正享知淫祀之無福焉徙知蘇
州代還判尚書刑部三司戶部勾院歷戶部度支鹽鐵
三司副使乘西師之後關中困乏及夏人送款疆事略
定公建白一切蠲去橫賦以紓其民東川饑受詔為梓
州路安撫使勞徠安定全活甚多還朝除戶部郎中天
章閣待制充江淮發運使承前居是職者每歲上計必

取大輜載奇物輸權門以售進公再任前後五年未嘗
一至都輦章奏皆附驛而上除河東轉運使未行徙知
洪州又改應天府兼南京留守司歲餘遷左司郎中知
杭州會高選名臣以殿右蜀遷樞密直學士知益州蜀
人偷浮不識敦本前守如乖崖承寇亂甫平一切權宜
務安遠俗後之來者以為治蜀適然耳而又增益侈費
十倍于前公曩官于眉習知敝俗常曰國家承平百年
聲教萬國蜀士學尚不減鄒魯惟此習俗尚安餘風二

千石恬而不怪豈承流宣化意耶乃興學校省廚傳凡
過泰無名之費姑息不正之事多所裁革未始顧慮者
舊有識者竊喜公所為咸言庶幾數年吾俗且變貪吏
醜正惡不利已復有肺腑舊族逋責列肆累政不敢治
公裁之以法遂入訴近習且造險語飛聞于上謂公變
亂舊制蜀土且搖遽移公知河中府迄今蜀人歌思之
不已公至蒲嘗感危疾表求便郡再知杭州遷左諫議
大夫復徙知蘇州明堂泛恩改給事中公治杭與蘇俱

有遺愛及重臨二州幼艾相攜迎拜道路吳人于虎丘
生為立祠明年表還官政朝廷崇禮者碩閔煩事物以
小宗伯秩聽行其志力是時年耆者類不即退公在杭
州日業已治第吳下既而得請角巾休舍措紳高其識
平生愛客應接不倦亦既告老精力尚強佳賓至前清
談不廢所居溪館有芝草產焉一孫少孤二子皆幼至
是參侍左右咸以為陰德之報感疾既革遺言誨以力
學口占後事命弟之子之奇疏于牘背已與親友訣神

色不亂含玉之日壽七十五吳中士大夫若吏與民莫
不相與流涕朝廷公卿表其德範宜加旌賁天子惻然
命以優恤特贈尚書吏部侍郎未三品非例也公學問
道本原論議依名節其行已也直其從物也裕人之有
善不啻已出孜孜獎進須成就乃已所至以拔才薦士
為已任或譏以太廣勉之少峻公以峻則遺物卒不易
其守歷典會府者七所至之治必先美風俗扶名教不
專于簿書聽斷而已治蜀日常召高才碩生會試府寺

親校才等勸成學者于府學之側別建西學以廣諸生
齋室訖成而公移蒲中其後轉使毀之以增廨舍既而
常山宋公尚書至府聞其事歎惜久之且欲成公意乃
即其舊趾建文翁祠祠之內圖嚴君平鄭子真司馬相
如揚子雲蜀土先賢凡九及公之像而十常山公為之
贊至公略云蔣侯挺挺天與嚴方健而文明不逢不將
迹其風德從可知耳公有高情富清藻多所綴述尤遽
于詩其間所得往往清絕善作尺牘思致簡詣時人得

之藏為名筆及退居林下神機日旺雖飲食寢處未嘗
忘詩亦天性然有文集二十卷初義興家墅濱鬲湖之
右蔣氏大宗之碑在焉公之曾王父諱幼蟾大王父諱
宏謹皆隱德弗官王父諱九臯以公貴贈尚書刑部侍
郎妣史氏追封廣陵郡尚氏宣城郡二俱太君公出史
氏娶錢氏封壽昌縣君先庚辰十二年而公後舉以合
葬焉子三人長羣玉早卒次長生次長源皆為大理評
事女四人長適刑部郎中知制誥邵必次適都官員外

郎王景芬次早卒次適處州青田縣尉宋寬孫續任大理寺丞通判利州初公捐館遺恩以續簽書平江軍節度判官廳公事自言少孤育于祖乞服衰麤以報朝議以公有子不許遂辭疾謁醫去職行服雖不如禮識者重焉吁哉道之難行以公吏師治蜀美績弗究不登三事其命也夫宿早依門牆稔聞閥閱茲用傳信亶無愧辭庶使三吳吏民過堯峰者為賢公墮淚云銘曰公之志潛于斯民平昔蘊蓄曾弗大伸公之才足經當世華

皓卷藏未能殫試刀州之學有像是圖君平子雲盛德
不孤虎丘之趾有祠特起太伯季札高風孔邇嗟嗟尺
璧長掩山阿神明潛翳惘若之何震澤東漸靈巖西峙
公雖可亡德音不已

故秘書王公墓表

故秘書王君諱樞字慎之姓出魯之屬邑其先句須為
之宰後因焉漢有丞相衡晉有將軍術乃其苗裔播遷
之餘也累世占數常州之無錫以避太祖諱上之字改

稱王焉曾祖克模祖建寧俱仕南唐為偏將以驍果聞周師圍壽春國主令君祖齋密詔至守將劉仁贍所致命而還後積功勞卒于信州刺史考德政仕南唐為資明庫使歸朝卒右侍禁君第四子也幼警悟有學工于屬文體裁典蔚天性善書喜為楷法其落紙也如飛人望之意以為草即之真美可愛十三歲侍父征南海市舶故工部侍郎凌公策時為轉運使賞其神俊妻以愛女凌公後典成都得任異姓為官以蔭試將作監主簿

非其好也鑠廳就本郡之舉取為首選明年中丙科守
秘書省校書郎知湖州長興縣治有風迹嚴而不殘丁
內艱去官焦毀成疾以祥符丙辰十二月十一日卒于
京師伯氏函其骨歸吳寓于惠山精舍三十九年子翔
為睦州建德令感幼貌失恃僑寓未葬赴郡謁告乞治
喪事以書來赴曰我先君將葬日月孔邇願得銘諸壙
中以謹行閼會予受詔聯知貢舉逮已事而出則過期
弗及遂以皇祐癸巳四月十五日卜葬于無錫縣神龍

鄉義昌里大塋之次是時再世猶在淺土至是舉葬者
凡六喪繫克家之幹也秘書某人從外兄也總角時以
伯氏之命得依其舍為學君太夫人范陽盧氏山東舊
閥賢而有範閨門之內不肅而成視秘書子均同子姓
君之伯氏植器業磊落綽有風義凡所論議必依名節
吳中士大夫日游其門某以鰥生受教君子恩故彌厚
歲不我與忽然四紀二惠競爽抱志不伸伯氏嘗舉進
士以親老不遑擇祿後卒于右侍禁君之易簀纔二十

五歲貌古神秀行安志美時人咸期遠到不幸夭闕其
後同時儕類多至顯仕使君且壽未易涯耶長子曰翔
進士擢第葬之明年冢嗣以最遷秘書省著作佐郎知
河南府壽安縣得告展省咨予以前銘有關且曰表其
墓可也追惟平昔受訓伯氏義不可辭故同其伯氏云
故右街副僧錄普印大師賜紫昕公塔銘

有宋大士賜號曰普印居景德蘭若以至和丙申四月
甲戌宴坐示滅客采若生壽七十有四臘五十有九都

城緇俗燎香膜拜者日盈其室越仲夏甲申弟子文顯等奉其全身立塔于都門之外寶慈寺之別園也師諱昕姓曹氏世占數于丹徒六歲出家奉金山沙彌幼仁為師十五染法衣明年受具戒挺然節尚拔于時類未幾臺恩以例賜紫方袍年二十餘通華嚴起信等經論雅好易學長誦說山中晨起講經午後說易如此累年未始有懈已而聞五祖山戒禪師有佛知見往求印可咨決心疑法要瞥聞空門遙解自爾按趾莫非于海印

舉足皆是于道場一錫隨緣僑止輦寺行願純備名稱
普聞王公大人傾向其風以謂挹之彌沖淵然而粹莫
不服其清遠去疵吝咸願叩繫表之益申方外之款龍
潭潯陽之勝刹也遣徒迎致求轉法輪師承請驩然業
已決矣會兩街上首與名勝百數詣京府薦留願縻以
僧職乃署左街守闕鑒義稍遷右街副僧錄雖居大衆
之地不異寂默之境定鑑有來而則照洪鐘隨叩而斯
鳴素琴寶書蓋泊如也晚遽于易參京氏著論三篇造

至韞常曰三聖極摯本無言說淨名不二法門乃至無
有言語文字仲尼亦云予欲無言又曰天何言哉老子
西出關尹喜曰子將隱矣強為我著書于是述道德上
下二篇由此觀之默指可見然不離文字而說般若于
是有三教會同之論焉未圓寂前一月手疏履迹見託
狀其淨行緒言猶在而哲人已萎豈非靈知逆照其來
乎追踐前言姑銘其塔云有皇庖羲思索其極觀化至
神畫而為易有師少林妙解甚深逗機諸祖印之以心

三極精微一乘圓頓孰會其宗導師普印覺門耆俊智
地妙明昔來江域留舍都城緇素欽風王公挹德定慧
參持威儀孔力毗耶示疾趺坐云亡感深茲土迹應他
方神明曷之話言已矣塔閼全身狀攜隻履背宜春兮
下苑即逝迹兮外園噫大士兮普印寧委蛻兮茲原

文恭集卷三十九

欽定四庫全書

文恭集卷四十

宋 胡宿 撰

行狀

太傅致仕鄧國公張公行狀

令公本系清河五世祖唐任刺史因僑于漢南曾祖諱

某以廷尉平總襄鄂七州都計居襄帥趙凝府

案趙凝唐書作

趙匡凝此避宋太祖諱缺之凝為梁所敗走江南因避地鄖鄉卒葬

于斯祖諱裕字某試金吾長史嘗莅陰城監院遂占數
焉後榜陰城曰軍光化是也考諱廷朗恬曠卷道翔去
弗仕咸以醲德厚行品于州曲慶靈回復克開厥嗣其
後公貴三世竝追贈開府儀同三司太師兼中書令尚
書令以郕楚韓三國公啟之封曾祖之配曰郭氏祖之
配曰胡氏封燕國晉國太夫人妣趙氏封魏國太夫人
繼母二曰龐氏曰李氏以韓魯越竝加太夫人之號初
魏國產公七日疾且革有姑適全氏以公屬其姑曰娠

是兒覺有異今疾不支以是長累姑矣語訖即絕姑感
慨鞠養同于已生公生百餘日甫能啼幼即穎特習貫
如素及其長也身長七尺天骨峻擢隤然志量莫挹其
際受經于嵩陽張恕先生恕有道之士見公學尚根本
行中儀矩歎謂之曰子天機如法未易可涯後與濟北
戴國忠廬陵歐陽慶學于鄴城淳化初本土勸駕端園
覆試于時取士優先舊人初詣公車者臚傳報罷公颺
言曰襄漢人士陶化尚少必欲諷勸學者乞從隗始占

奏條暢太宗聳然異之即賜公第解中郎鄉簿先墓在
焉初政有條衆畏且愛秩滿除射洪長蜀盜甫平瘡痍
迄起賦重俗惡不堪長治或恤公曰得射洪何哀盍易
他邑公曰事不避難志不求易有民與社吾何懼焉至
即安集勞徠恩意甚著夏旱郡邑馳禱靡神不舉公初
至邑齋戒外次禱于白崖山陸使君之祠既奠而跋斂
版以俟時陽驕熾天無纖陰須臾繁雲大合而雨連屬
三日遠近霑足涓辰報貺刻文識其祠下剝輕聚盜保

匿境內公廉知主名陰設方略詭以輕事一切捕繫數
日州果符下牙將提兵捕劇賊陳漢遇八人至則賊已
獄矣咸稱神明轉運使檄請治鄴便道詣郡射洪民數
百追路邀持公馬首以歸曰我邑官人也郡以其狀白
外臺檄至聽還本治其得民心如此張貳卿守左蜀有
採訪使至郡詢屬吏之賢否雍曰本郡十邑屈得一指
惟張射洪耳後除襄陽長內艱不赴除喪趨冬集出許
下故內閣查公道時領漕京左嘗更守蜀郡高公射洪

之政館致累日以書薦于楊文公大年文公遽于風鑒少所許可一見大加器賞便期以公輔促公獻文闕下自攜其副介于執政業有俞旨行給試札會有澶淵之幸事從中寢以薦例應格除祕書省著作佐郎知邵武縣民喜訟吏詆欺前後宰守經常繫者不減一二百公平處悉當劇易迎解訟源自閉牢戶至空軍帥武白訪公詢今昔煩簡之殊致以何道公答曰前以精密致煩後以疎略成簡白尤歎語致之美嘗手植海棠于庭中

後之為邑者欲伐去老吏以為不可泣諫乃止迄今訂之甘棠焉遷秘書丞監在京折中倉除御史臺推直官楊文公薦才堪御史兼除察視時貢舉新格始用糊名張設科防間有未密公受詔巡鋪巡經學已因白主司有親戚在進士中明當引試于巡體非便請出以避嫌疑主司以令甲無有公自表引去不俟可報真宗覽奏深加歎息因記名于禁屏自是著令與主司有雜嫌者移試別頭江南轉運司闕中書兩上擬目已再見却矣

特有宸旨越次用公封禪汎恩就除殿中侍御史在江南歲餘除侍御史移廣南路轉運使公以南海饒寶意以足鑒雖所須藥物皆自北營致而南到部市無私焉章聖意在試用故嘗以公番禺一二所為伺知治行時朝家獲元命之符因輒馭之格訪四方州郡置觀榜以天慶公上言嶺服僻陋不堪大役建議諸舊有觀處宜改用金額別增一殿以虔朝謁朝廷從之班下著比時太尉王文正當國歎其有體識西祀慶成就除尚書兵

部員外郎被召入對延見數四言皆意合去輒目送以
將漕之重除河北轉運使詔徙棣州以避水害城中糧
餉滯積議者難于遷運時濱河諸郡歲飢艱食公裁留
支計餘竝貸以與民約以來歲輸還新州公私便之如
期率集明年主上出閣高選僚友召還除戶部郎中充
壽春郡王友規中入謝上面諭選卿來久幸煩友教公
俯伏祇詔恪勤授經敷譯聖言開導元良德必依孝動
則循禮上徇齊而敦敏學緝熙而光明卓然日躋繫于

體訓授詔充契丹國信使辭于便坐趨入殿戶馳遣中人召入引至上前諭以元子煩卿誨接朕嘗以卿語宰相最愜于訓導輟卿不可以使材之難少逾卿者公因叙謝趨下再拜復召升殿再諭此行出境惟當執禮答問以實若關兵要辭以他語賜坐啜茗謁者贊罷復趨陸石對揚天子之休命公初入壽邸及主上一經之畢真皇皆賜御詩褒美焉至是聘北復有宸藻寵行朝野榮之前無此比使還稱職以國藩初啟除昇王府諮議

叅軍東宮既建除右諫議大夫兼太子右庶子未幾昇
左同知審官院事四年兼太子賓客知審刑院判史館
兼樞密直學士審官如故真宗治定淵然凝監太清機
政參裁旁倚儲德始以二府正弼通領官職除公太子
詹事會靈觀判官餘如故五年以本官拜樞密副使尋
遷給事中皇初紹宅三遷戶部吏部侍郎尚書左丞充
祥源觀使竝居內密之職六年拜禮部尚書同中書門
下平章事集賢殿大學士明年罷相遷刑部尚書知江

寧府九年來朝京除定國軍節度使鎮許下十年拜刑部尚書行中書侍郎同中書門下平章事明道之元落成宮寢職在使領二年遷兵部尚書升冠宰席兼門下侍郎昭文館大學士監修國史獻懿二后祔洛以公充使領護園陵尋除山南東道節度使同中書門下平章事判許州景祐二年有保釐西洛之命五年復以夏官尚書升序上衮寶元郊類充大禮使籌相儀之勞進封郢國公上方倚任舊德挹仰耆訓機務大小一一咨決

公亦竭精盡慮彌補察讜言善策隨事獻納自以儲帷
階進感會聖恩思潔進退之分全君臣之美欲後世莫
窺其間于是七露章推言已意求還時柄天子憑賴中
旨批諭有公無困我之歎進見乘間又懇懇乞骸上亦
感悟其言閔勞職事冊拜太傅致仕進封鄧國公許朝
朔望及大朝會綴中書門下班都城出入許施青蓋師
瞻主睠終始尊顯國朝宰相自中書致仕惟公一人而
已艾服官政五十餘載內修孝悌以廣親親外崇禮樂

以接天下保誠任素履中蹈和乾興受遺繼秉相軸皇
初遵晦獻后參制近習藉寵勢有放焉公與一二雋弼
同心彌縫闕漏消弭間隙援進忠謇選用儒碩備諫正
勸講之任開益神睿綱紀亶穆厥功茂焉冀州上曹某
急變搆甚者規中樞老二宮召質諸弼俱無言者獨公
保任大臣無異志言色詳正卒指以厚善罷公政事出
金陵上終眷之後復其爵上還所籍田廬甄其子孫公
中不自欺大較如此凡所解釋多見全度好獎進士類

喜掩覆人過不念舊惡特稟純孝感姑撫育事之如母
姑亦早寡一子文秀後卒復棺之際公適在外及還盛
暑堅求發棺已而視之哀慟殆絕姑為之輟泣曰吾子
雖死汝在固無憂矣公悉心奉養先意孝順姑後病死
行服營塋身相舁柩徒跣墓次行路觀者歎息純至及
在樞宥表陳前恩特贈姑南陽縣太君姑之子文秀贈
太子左贊善大夫刻石以紀其事今宜猷原武鄭公之
文也每語及姑兄泣然流涕武當鄖鄉先塋在焉嘗表

求置寺以紓罔極詔以乾興賜之額營築之際工徒艱
水溪路回遠疲于行汲一旦墳側靈泉自出役夫持鍤
隨而浚之淵澮甘清絕異常水飲者皆足衆不病渴日
月引長施及墟落公刻文志異名其泉曰孝感錢思公
美而作頌併序其事公奕世滋善深奉竺乘公學力之
強妙悟性理寂默常照疵吝隨遣不使纖芥點于太清
以至歷四方經百物神用無滯機應不差于將莫邪所
至立斷隋珠和璧未嘗自珍初服小官晚都大位久幽

不改常操三入而無喜色所謂器博用大道周性全者
也出殿大邦克勤小物不養虛體務收實迹所至有愛
利之風無苛留之獄許田患水築隄以捍堅完峻厚歲
息愁墊許人至今蒙其賜及得謝神明克壯旦起玩易
老閱華嚴諸品與赤髭白足之士對談法要得名教之
樂忘形役之累城南賜園殊為名勝暇日後車載客相
從文酒雅題探賦清篇賡屬野興所適或累日忘返公
綴文根道尤邃于詩峻整平淡通有二體登科日嵩陽

張先生以詩寄公云全篇合雅道一舉得仙枝乖崖張
尚書以雅道自處少所推挹嘗覽公詩云巨峻如天設
看來字字精功夫能到此心意可知清酷愛張水部籍
詩嘗評之云語雖似近思致清遠淺于詩者不足游其
藩閼保釐西洛有三游嵩少詩及還政事與故相官師
陳公角才聯唱詩筒日至搢紳多傳諷焉況之劉白公
嘗受詔主作皇太子及寶元尊號二冊文典厚深重世
稱名筆撰集則有明道籍田謝廟二記箋註御集譯潤

經文公咸預焉文集十曰應制曰春坊曰舊帚曰江嶺
曰許洛曰歸政曰過家曰小集曰雜文曰表章內七集
自作序冠其前行書適勁毫法殊逸尺牘所作人競藏
弃歲時伏臘太官珍甘班賚兼優勞問不絕元會誕節
參綴宰聯抃舞稱觴百僚聳觀龍光體貌為時元老上
嘗遣近璫持賜公飛白千歲二字神毫奮迅天然攸縱
公進長歌二百言稱謝優詔賜答模以琬琰龕于西堂
翰林學士宋公子京為之序前後所賜宸翰積百餘軸

居常祕奉公以乾德甲子九月二十一日生于皇祐元年正月己酉晡後薨年八十六歲上聞而震悼詰旦車駕臨奠哀慟數四賻中金三千兩輟視朝三日冊贈太師兼中書令翼日便坐決事上顧宰相曰張某可惜昨日有言庚戌是朕正本命未可致奠朕以其師臣舊德首于藩邸輔導遂定志而往宰臣進而言曰陛下如此過于唐太宗辰日哭張公謹也茲事不惟張某之幸實為陛下聖德之美乞宣付史館庶幾光輝行遠上從之

二月某日皇帝出哭于外次百官奉慰哀榮之極人臣少比初公卜葬父母遇觀之蠱卜者曰易所謂幹裕其父母吉孰大焉上九不事王侯高尚其事公將終身履之貴而有壽其後三師就第十年棄事養和綏福得上九之象焉間歲一還鄖鄉拜掃塋墓三世墳典皆至極品卜者幹裕之說不其信歟未薨前二日猶之園墅晨起感疾初不甚苦方答親客書簡俄而委順公起布衣為王者師三持化樞再領台鉞任德爵之重為典刑之

老易之大有上吉書之五福嚮用公皆全而履之初無缺者初娶蔣氏追封晉陵郡夫人再娶黃氏追封英國夫人三娶馮氏封舒國夫人皆賢明婉靜儀諸中閭男子四人長友直任尚書刑部員外郎直史館友偁殿中丞友正將作監丞友誼奉禮郎蚤卒四女長適工部郎中安積次適刑部員外郎集賢校理李昭邁次適太常博士呂公孺次適刑部郎中王素適安氏王氏者先公而亡龜筮襲吉日有期周咨家臣參稽官閥敢陳有

覺之行願摘無愧之辭謹狀

李太夫人行狀

後封沂國太夫人

太夫人姓李氏占數晉陵世為賢家曾大以來敏德厚行名諸州曲考諱某力學早殞不階宦達娶強氏生三女太夫人即其第二息幼挺淑質長蹈雅性姆教匪習自安于中行女功不勉皆臻于妙趣以守龜云吉遂歸于我先君寺丞逮事大門及侍公姑朝夕恪共儀止淑慎躬親執煩辱之事造次亡喜愠之容旁絕間言動得

餘裕及大門捐館尊姑在堂時年八十餘矣能候慈色不失美意時先君患舊華隘甚謀攷新室或計土木之費旁沮其議太夫人曰不然今姑年迫矣脫有不諱外姻且來是間何能周旋治第庇族差勝他費及姑生存得安斯寢饋于是粥于是歌于斯哭于斯足矣乃出奩中之糴得金數百趨市材瓦落而成之未幾而祖母亡于是弔祭有所焉泊先君不祿泰山其頽泣奉几筵親持門戶訓諸子以學勗諸女以順歲時伏臘祠祭必誠

諸物內外姻族慶弔皆躬其事或有匱乏之至為經恤外
祖之亡一子尚幼自零丁孤苦之中使之成就樹立皆
出勛養之勤遂承其家逮至暮年數見重孫篤羊棗分
遺之慈盡鴈鳩均一之愛持禮由于繩墨用心過于丹
青黎明以興盛服而坐習知四諦之苦歸信一乘之法
神珠百餘誦觀音名號持般若心經像前焚香日繫其
合貌是諸子尸諸外官至于賦政緒餘立身本末莫不
提耳蒙教持心俾厚奉戢悔尤得免罪戾實繫慈訓平

反之故寶元中郊類泛恩啟封上元縣太君慶歷三年
孟夏交吳興郡章奉版輿寧里閏昊天不弔大禍奄至
以中秋八日感疾終于常州孝仁坊之私第享年七十
有五臨終神色如常初不怛化顧視諸子徐以手握某
之臂良久合掌加額曰願汝無忘善性諸子以有為之
法乞營佛事頷而許之言訖即終初太夫人以丙申八
月壬寅生于某復以癸未八月壬寅委棄諸孤至慈無
窮大恩未報追誦寒泉蓼莪之什劬勞顧復之施恨不

得先從地下驅馳螻蟻苟延視息亦何忍焉子五人長

曰某至性淳至次曰宿任太常博士集賢校理曰飾曰

實曰賓舉進士南省下女二人長適進士朱況

案況姓名見唐

詩鼓吹所選胡宿七言律中元好問既誤以宿為唐末人于況自不暇深攷此足以證其失


次適桂

州司理參軍葛武皆先太夫人而亡孫宗度宗陽宗堯

凡二十四人宗堯擢進士第任饒州團練判官餘或干

試有司或纔習緒業重孫元規而下凡六人日月有期

諸孤相與追記平生狀實乞銘諸竈以光幽壤



文恭集卷四十